

四庫全書

集部

欽定四庫全書

集部
藝齋文編卷三

詳校官起居注主事臣顧宗泰

主事臣呂雲棟覆勘

謄錄監生臣劉楷

欽定四庫全書

彙齋文編卷三

宋

趙孟堅

撰

序

凌愚谷集序

文章至唐而體備其情態宛委肌理豐澤腴而密婉而麗斯亦世代至此而盛乎故自貞元元和而上李杜韓柳以至乎長慶元白皆唐文之懿也大中以降瑣澁滋過固一病也而又浸淫於以俗為雅之流代號作者或

不免是况浸淫於末流者乎杜荀鶴於詩接五季之碑
碣可槩觀矣然則論唐文者不得因其流而訾其源也
皇朝文明代興慶厯以前六一公歐氏未變體之際王
黃州范文正諸公充然富贍宛乎盛唐之製亦其天姿
之質已脫去五季瑣俗之陋一陽動於黃鍾厥維有本
伯長一倡尹歐仲塗和之南豐三蘇又和之元祐諸君
子又和之轟然古雅至淳乾尚餘音韻其風稜骨峭擺
落繁華亦一代之體也然夷清惠和各隨極至塲屋習

勝視唐疎矣孟堅晚學每竊有志初筮葛溪司征愚谷
凌君雲日從遊處出其所業何其不蹈於場屋之習歟
為余言曰先君子藏書滿樓金石遺文之富不愧六一
之千卷惜乎祝融煽灾靡有孑遺然如印印泥胷中所
存尚猶燈下千里故人面也曰噫行沅湘者率能道芷
蘭香草之異目所經者如是乎子書雖灰胷中有不灰
者在典型其有自夫以其言之涉唐也亦得之金石云
爾故極道世代而歸其編

趙竹潭詩集序

詩非一藝也德之章心之聲也其寓之篇什隨體賦格亦猶水之隨地賦形然其有淺有深有大有大槩雖不同要之同主忠厚而同歸於正自賡歌國風雅頌而離騷皆歸於正之詩也杜工部詩言愛君憂國不失此正所以獨步於詩家者流也由漢蘇李五言建安七子晉宋之清虛齊梁之靡麗至唐而歌行吟謠怨歎詞曲等此而律生焉詩之體備而詩亦變矣然忠厚而歸於正

者未嘗絕響東萊麗澤所次是已今之律體是特一耳
非謂詩之能事止於是詩亦豈惟泥體不究其義哉其
發也正則演而春容大篇忠厚也東而二十餘字亦忠
厚也砌景於一聯夸妍於一字無所感發詩豈然哉寶
汝吟律精工參之唐人可也余望寶汝不止是其廣充
吾言合於乃祖得全之義則思過半矣

送海鹽王尉序

辛卯冬有客至鄉郡者語人曰吾待海鹽尉次瓜時縮

至吾督遊諸此也及明年夏之是官者乃孟堅同登州
趙君耳後三年嗣至者上饒王君耳竊訝焉既而天都
值前客訊之曰曩謂及瓜奚尚尔邪曰曩聞前轍弗留
今彼無恙且上矣吾須焉未幾王君以臺評劾劾之章
曰貪也其嗣從私貿也賂於郭而受於吳也訟於倉佚
罰於憲也孟堅讀之髮聳豎曰王君章泉澗泉里友也
見聞如是為如是夫及詣邑見里大夫若士則喟然以
歎見吏若民怛然以戚環而曰尉去非其罪孟堅曰臺

評誣歟曰評非誣風以聞者以之誣耳王君謹約俸入
絲身穀腹弗給弗顧也貪歟二子侶詩禮踐弗逾闕
孰私貿歟郭與吳亡是公賂鬼輸歟倉憲牘無攸稽誣
非歟曰王尤若之何而若為是誣以誣臺論噫一官而
三人共之其汲汲也舊矣天定能勝人昭昭者在矣庸
何辨姑飲王君酒大書以侑其行曰端平三年冬十月
丁未海鹽尉王君從事以御史風聞劾罷李特卿以次
來赴

嘉興司法廳題名引序

墨曹司一郡刑章出入獄雖成于彼生殺輕重則一定於此金科玉條程準權衡斯在吏姦不得一舞手足請屬不得以致軒輊據案冰清閱實讞狀矜莊恪祗凜乎明神鑒前清議臨後也引據一差毫釐尋丈况以私乎私吾無徇矣明者過察不知入於刻也昏者受蔽不知流於弛也縱惡罔悛淫刑匪戾厥民何辜上天有鑒嘻其可畏哉禾興於今為翔輔民藁事萃詞牒猥繁曹掾

在選不輕受泣而能聲易昭前茲壁未有記何以示能
不能邪宗叔崇儼來謂不可於諸曹獨闕典諗諸同舍
妣孟堅屬詞以肇題記自某年某而昉具刻今而後至
若替畢書非但誌月日姓名也能不能於是乎觀是為
引也然程準誠陳權衡誠在高不可下重不可輕固然
也舉而行之則不在我亦所遇之何如耳孟堅曩尸臬
事且攝墨曹以至令越但知克審然平反嘗得以甦枉
而嫉惡或有以招尤遇者然不遇者然也遇不遇人也

能不能我也不以人而易我其斯無負厥職乎

孫雪憲詩序

詩者英氣之發見於人者也鄙夫猥徒定無詩高人韻士有詩名臣鉅公皆有詩感遇事物英英氣槩形而成詩亦猶天有英氣景星慶雲地有英氣朱草紫芝是也然何嘗體製限哉竊恠夫今之言詩者江西晚唐之交相誼也彼病此冗此警彼拘胡不合杜李元白歐王蘇黃諸公而並觀諸公衆體該具弗拘一也可古則古可

律則律可樂府雜言則樂府雜言初未聞舉一而廢一也今之習江西晚唐者謂拘一耳究江西晚唐亦未始拘也鴛湖雪窻孫君志古工吟持編過訪嘉其體備而不時世粧也因與之言雪窻其感而寓興以有韻之文春容大篇北征廬山高其行葦乎精密簡短秋浦其流麗乎載揚古風一洗靡習吾其望子

記

海鹽縣重築海塘記

吾邑在郡東偏取為瀕海市洋相距纔二里而近潮汐
侵尋隳疆妨稼在所必葺前茲土築雖頻若夫圖功永
存大施規畫其屬吾史令君乎君名亞卿字景聖太師
越王曾孫也勁敏爽特遇事銳心庚子歲同入西憲幕
癸卯又聯臚班見知君最深甲辰冬兩易此來每遇邑
人胥慶得賢令也天基節諸邑遙祝聖班粵翌日鄉校
職長常賢孫等過余言曰海塘為吾邑至急務惟工力
弗固則隳圯隨之去歲風號扇威推卷斥鹵大害播事

人幾為魚今史君下車亟是營度以修以創知先務也
邑人德之學校士議政善否刻記以聲令能宜先齊民
慄承一不敢懈偃然虹垂成於不日工役有經一可紀
日役千丁旬幾再浹糜粟給券一辦公家不配於下不
請於上隨用以給罔見乏使當帑庫赤立之餘旬月乍
至之始咄嗟以定見謂如神築地所經或當民產倍直
給酬了無怨咨又捐圭粟歲儲千石掌存邑寓以備修
防措畫有方二可紀有二可紀子尚奚辭乃即而比次

其委因諗言曰威名方畧非可強選人才如奕棋舉手
可知優劣斯言惟允夫奕以取先為勝著子邊隅誰非
計勝當先而後事斯左矣今君未遑有他節損浮費汲
汲務茲既堅既固又圖永存斥鹵以防穢事用又豐穰
洵卜域內咸熙而後治吾教條沛吾膏澤學道愛人斯
為有本孟堅行亦令邑雖秦越不侔政之後先則莫敢
易謹頌君績以示永傳景行行止抑以自礪若夫鋪張
歌頌里有丈人比方聲揚繼茲藹若鄙又何敢曰盡能

事

德清縣平陽嶺興善施水庵記

繇邑而西路委蛇行五六里嶺曰平陽路直經嶺上車徒共由往來負荷登涉斯勞憇倦舒息咸于是而休焉其或日向炎雨驟至舊未有所蔽障也昉淳熙甲午道民丁妙超募緣買地嶺上結菴以居前跨通衢架涼廊列坐檻以便休者維夏之月則注湯淪茗施濟煩渴人便賴之丁既往僧妙崇繼之道民沈妙淨又繼之一踵

前規以處應施妙淨又募緣展地邊隅以拓蔬圃加飾
菴廬以崇像供里之善友沈宥德輩為僧置翁家園田
五畝以助其薪茗資可以久濟人而不墜道民善友咸
願刻石菴中以示來者期于無斁乃具其事屬余叔新
班君畀余為之記不敢以拙于詞而謝也既為序其實
從而歎曰事惟非私諸已乃克久而無弊僧廬塔廟主
其事者前更後易非若室家之父詔子祖傳孫也然歷
年雖百數而常修舉富家大族父祖經營勤勤詔後非

不切至率一再傳而中否何哉此公于人彼私諸已惟公則不事事者不得以居夫然則若之何而赦之此刻石示後之意余為宣揭之將見繼者益勤助者益多往來者益有賴豈徒誇能事哉余為文又為之書因請余叔以隸其額

五洩禱雨記

五洩龍祠在越諸暨西境界接星婺號小鴈蕩亦東淞名山也唐賢逮國朝先達題詠多佳句其叙山川勝槩

及龍神靈異則未之該也余為令丙午值旱七月二日躬禱祠宇時方勅賜廟號豐澤夕郎趙君扁宇甚偉余默禱神泉且言於主僧曰禱而雨當有紀果應甦濟將屬筆余以御史風聞斥歸卧故廬明年七月仍旱暑風竹簟間追想去歲禱祭經行之詳述寄寺僧補山中闕文云繇邑西南行歷大悲寺次陶朱巖西向半里豁見通達平石坦布天成匪由甃砌逾三里無掬土纖草右松林而左右澗澗之左右壁層疊漆黑水絲絲下注經

之如簾松風水聲夾道隨送不絕又西向當鷄籠山翠
峰崔嵬白雲聯絡無論陰晴竒變常新它山縱有雲象
輒復散去此山雲氣無窮觀也是日出郊微雨漏晴朦
明掩靄輿行折復互見尤竒由此西行大溪中二十里
石子甕盎磊塊皆白色以旱而然中僅一衣帶水涉脛
而渡回望東岸叢篁蒼翳石壁屹起挿脚清溪直上百
尺鱗疊方整若城塹若搗砧墻堵繩引行二百許步無
纖差若謂天然胡能爾整謂人為厥豈易致駭視歎尚

欲刻號疊石壁三寂亦弗及也自是奇峰互呈拳擎髻
擁螭蹲鬼獒沿溪引路九鎖而入越十二里無居人詣
半地祇祠禱必先告又二里次外龍洞又二里次裏龍
洞洞門皆在山腰仰望陰閭靡測碎石紛委玄圭蒼壁
角銛稜銳新若壘斷儼昭異物攸居爬拏下委二洞出
雲一黑一白禱已雲氣騰空合乃降雨又二里抵寺門
細泉淙潺隨步聽之醒冷謁祠宇古木障天巔崖欲仆
陰曠增怖拜祝已入寺昏鼓動宿憇遲五鼓告佛殿告

祖師堂初由天旱師謂西潭青蛇曰旱暵滋甚而弗行
雨安可諸蛇首肯飛空乃雨故禱必先焉乃詣東源由
寺西行向北山圍壁峙屏折灌木蒼蒼靡知上極泉自
頂來五節故曰五洩云然可見僅三耳中節又取峻弗
可詣陟別峰望焉斯及禱祈官吏至望瀑布從石壁飛
十餘丈如懸練衝激一潭若翻雪噴霧著人森寒猶曰
旱爾積雨更列望瀑設禱位陳奠祭拜跪瀝酒讀祝辭
屏若聽伺端笏跼躅僧梵颺聲震撼林谷數刻久愈懇

至從者覲伺金線蜿蜒出水盥具迎接斯上長三尺
餘首尾如一官吏拜迎致佛殿奉安已乃詣西潭亦由
寺西五里行溪中水盡洄易小輿崎嶇履石子如車輪
如伏龜苔封凝滑著脚殊難兩崖椽木垂藤蔽晦皆不
見天豐草腰齊蛇虺豢宅疑畏殆莫可屬步間亦植花
清芬細蒲沁石幽費自暢行方半前驅言已得小青蛇
蓋西潭靈物皆然率龍子龍孫也仍詣西源拜奠祭祀
如禮羣山互來奔湊下瞰枯木幽篁尤極寥閔禮畢奉

安五夜演揚梵事詰朝迎導歸邑三日雨應差官送置
靈物歸潭此余躬歷然者若前權縣事丞趙希恪所上
朝廷乞封號述詞尤彰謂方拜祈西源青蛇覘潭中三
接三不就問從者駭曰蛇在祠官靴襪際矣為尤異孟
堅曰龍靈而神者也神正直而仁者也其呼吸風雷發
施雨澤彈指頃耳胡不常雨必待致禱乃示威顯何歟
豈卷舒虛空出入溟海化微而著憚厥勞歟抑稟司帝
命曰雨而雨不敢擅歟抑民之無良不昭蔭佑必底艱

虞乃救之垂死歟抑橫目不仁黨姦蔑善有致札瘥宜
以延其殃歟不然有龍爾靈密在近比而流金爍石奚
此地之頻歟併記以昭神靈以示警戒諸王孫趙孟堅
子固記

沂泳亭記

朐山丘君令海鹽三年政修事舉百爾具興寫琰紀麗
洋洋其聲顧余弗葺一詞以皇令君之昭庸余則有愧
八月既望別君景魯堂上君曰縣庠沂泳亭成吾隸揭

扁已察案徐君諾我以記行勒石子盍書丹子書五志
也余唯曰敬執筆伺時徐君從檄泊冬未旋一日晴曦
宛春余散步歷亭下短墻紛鮮平橋欄整翠篠匝外漪
連暎前奕奕新亭屏若與靈星對峙三楹數椽不豐不
殺面列踈櫺亭亭愛日覆蔽洞戶颺颺涼颼卉木行拱
石甃繩直嬖姍勃宰不覺微吟身履鏗爾之興作焉展
如斯亭名之允也儒學分邑之陽望廛居甚遼修廊廣
廡幽賈塵絕諸生祭奠則聚齋饗則聚講說課試則聚

領袖職長業以既精又不假朝夕視也則虛亭永書靜
定融怡領畧蓋寡余方任戴冠負策遊修竟日洛誦倦
則寐醒復誦稍厭端居執書周行時亭未建地屬邑民
周氏每倚徙橋欄上自鑑清影唔呶久之或東行數百
步登浮天海樓浩歌長望至暮濤浴金而罷宵莫我和
販夫樵人麕顧駭視今令君不恡重費市地結亭以遺
爾士觀賞云乎哉爾士之業章句云乎哉蛩聲蠹測腐
耳踐履之學心融景會契叶神交一貫之悟不吾欺也

今蘄爾士意其厚歟吾徒孰蔽斯息斯孰游斯泳斯點
爾何如志孰同斯有德有造孰不負斯不然花畦藥欄
園斯可矣學何謂邪余懼孤令君意姑叙以告若紀作
興之詳日而月之則尚伺夫徐君也噫清風明月光景
常新果終孤君乎主張是者寬其來厚其養鼓其氣其
不自君乎君名來字少潛

興聖寺疏地記

嘉興興聖禪寺實孝宗紹統同道冠德昭功哲文神武

明聖成孝皇帝育聖之地也嘉定初元邦侯趙公希道以安僖曾孫始奏建寺事見太叅樓公所撰碑銘為詳然既頻年產畜用慳法未大振雲集蓋寡用既弗給雖巧奚運洎寶慶丁亥秋風水扇灾寺益大敞貳車任公良弼預董寺事申請公朝求命主持於是以冷泉上首虛堂智愚來至之日上漏旁穿墮廢滋甚愚力加振策以經以營逮二三年漸漸修舉殿宇廊廡丈室堂寮鼎更輪奐飾尊像冶洪鍾乞蠲租產之苛擾者亦既善矣

獨雲衲二處齋蔬所供無地取植是大欠闕粵有檀信
女氏戴淨覺自號悟菴道人者偕母氏王妙真以城闔
強菴地來施廣袤十畝餘歸我法界遂得雲鉏露鋪紫
芥青松蓋茹供湏受用俱足愚嘉其施求文以刻諸石
余鞅掌官事未遑也近從檄來歸因謁愚及山門則宏
闢端峙又非曩時委蛇隘束比流虹聖地鉅扁高懸邦
侯麗畫斯揭則知愚之勤勤斯寺有足尚者侯由是加
主張焉請併紀愚否日記以疏地名貴專不貴廣也余

曰不聞坡公參寥之辯乎供者幻也受者幻也刻之者亦幻也夫以石作供供受刻皆為幻今捨地隸扁皆非供乎供皆幻則於受也刻紀何擇何莫非幻亦何莫非功德何專廣之別邪且僧廬塔廟塗金碧而侈浩劫者求福田利益也維茲發祥闡靈實皇天降康有宋篤生聖人用宏中興之丕業赫赫皇皇軋周漢二宣而上征則增崇而顯飾之者為知所尊尚其但福田利益已哉余既揭是意將見樂施而至者不但一戴也愚曰謔哉

記捨地已耳君而推明及是人知嚮以勸矣迺記侯天
姓與憲其名德淵其字太師成公之嗣愚明之象山人
亦彼法中之精進不私者其能爾有以夫

耕讀堂記

甲子年中過湖北汝時一字全不識今年携汝過湖南
也學時人弄筆墨顏筋柳骨徒爾工島瘦郊寒竟何益
勸汝耕田勤讀書豐公非是無官職此故合肥帥時齋
趙君示子詩也子為誰璧玉汝也其示為何方嘉定甲

戊君赴益陽道經玉山王汝年甫十有五題詩客舍君
喜而有是詩也所題云何曰蒲地揚花雪不如綠陰叢
裏一茅廬解鞍呼酒邀春住地主欣然接敝車十有五
其能若此宜君喜也王汝今於居之堂摘末聯耕讀二
字以昭扁志不忘也孟堅曾外祖中司常公與豐公俱
以正論入紹興戊午黨議二家姻好尤篤孟堅亦預瓜
葛之施方北來道過門王汝邀示堂扁曰此右司陳君
仲方所隸且誦二詩屬以記固弗應辭然簿書鞅掌率

未暇頻書以督因詩有感於二公也乃惕然言於王汝
曰先君子勉玉汝以詩翰弗力拳拳耕讀可以意逆志
夫事不如人意十常八九當建紹初年天歆地拆諸君
子出死力欲與國家復境土雪兇讐心通於天姦檜以
一和字掩過之諸君子阨窮以死不獲伸以息氣豐公
尤烈也先君子踐家學半生崎嶇兵間當邊嶮備嘗艱
危者累抑非無功於時者方嘉定間乍顯乍晦亦莫展
盡志之難行也如此夫當不遇之時每有獨善其身之

思惟耕惟讀期清白紹屬不於藝文榮達者豈無意哉
既又歎曰我祖豐公豈無官職者其所遇何如味斯言
也可以長太息也玉汝其悟已夫其驗諸身而益信夫
嗚呼不能側媚不可以干榮不崇苞苴不足以媒進同
聲濟水者為得計摸稜首鼠者為趨時遺君後親倒亂
曲直者斯不刺俗眼也心乎先烈奚怪落落力耕勤讀
計之得耳妄窺先志以訂所安以慨凡百雖然三江五
湖風石之竒不激不發繼今讀書愈多成就愈大時清

明矣豈久耕於是哉時齋諱綸豐公中興名相賜謚忠
簡侑享清廟封其食邑人仰之如此知臧孫有後故併
記而不以名書

狀

謝安吉使君黃寺丞先生京狀

孟堅伏準照帖舉孟堅明敏有文強毅不撓充改官親
民使者京洛識機一見已蒙於厚顧輔藩薦禰三生即
信於良緣恩惠彌天謝誠跼地伏念孟堅最為好直祇

欠學圓獨奮孤寒頗歷風霜於早歲自期節義願為砥
柱於頽波凡是素心不入時樣微如字畫猶考偏旁寓
在吟哦亦闕風教以此移於吏事斷乎不敢私心當繡
使之行臺借階抗議勸大家之發粟力救時荒甘食藥
以守廉束濕薪而馭吏蘭薰同臭渭湜殊流不圖末路
之榮獲遇知音之舉載惟合穎尤重常員判分京選于
天淵頓生功名之羽翼矧陳力之未久便刮目以誤知
槩彼尋常誰其特達茲蓋恭遇某官超然遠覽卓爾達

權自專衡鑑之公取于尺度之外屬方建府首急揚材
第慚借譽之言幾于許可之遇斐狂有作正虞所擇之
未精操守無移或病執古之太甚文乎何有敏又安能
被寵兢兢持心惕惕在春風之下同桃李之無言歷歲
寒而觀期松筠之勁節

謝發運權憲節齋先生京狀

孟堅伏準照帖舉孟堅志尚博雅才能卓異靖共自勉
職業可期改官親民任使者歷事霜臺夙蒙賞鑑一封

露剡迄藉吹揚終昭衡鑒之公倍感孤寒之跡示先寵
于臨發申勉礪于將來加意玉成戴恩天大竊以脫選
須五奏剡在今號甫登科屬吏百十員誰無冀望間歲
一二舉得甚艱難于常員已自不輕矧職司所係尤重
合淮浙而分部蓋英俊之如林求者非止一人之懇祈
得之可定半生之榮悴允非細事豈易畀人如孟堅者
涉世殊疎信書過甚孤分獨立淒其寡鶴之無羣周章
費詞幾于畫蛇之添足粉飾修治了無時樣巉巖岢嶭

惟有古心出手辯冤獄之誣活數命于垂死歷階抗部
使之議獲一頤以回榮是皆拙計之勞身第招冷笑之
冰齒誰分鼠璞自晦龜藏溝木忽被于丹青爨桐獲調
于律呂茲蓋恭遇某官道德純一識見昭融禮樂詩書
容止可度文學政事體用兼該撓不濁而澄不清言有
法而行有則作屏壯維城之勢飛葛著騰槽之謠雖遊
刃之恢恢惜寸陰之疊疊粟賤已歌李峴衆既傾心迓
衡行相姬公即歸調鼎猥収么瑣預備使令嗟人心好

尚之殊有衆口鹹酸之異不隨愛惡以石轉重增感激而涕零重念孟堅奮身艱勤立志警策韶年家事窘垂磬之屢空子夜書聲惟短檠之相守雕鏤肝肺收踐科名搯履素危行已應謹第為任直而磊砢不覺或越乎準繩仰冀包荒少加容養庶幾展布有所報酬孟堅敢不策蹇忘疲磨緇尚白期無行已之玷上負知人之明使君忽敬其朽株幾于輕予忠臣益彰于勁草請驗將來

謝安吉謝使君養浩先生京狀

伏準照帖舉孟堅吏事敏強風猷清雅明于折獄多所
平反充改官親民任使者古心雅尚素云臭味之同春
首薦員不由介紹而得自知歷歷叙謝拳拳伏念孟堅
朴甚不華直而無倚祇招譏誚于流俗敢忘榮達于今
時第貪便親來廁猥掾我心不轉恨未學圓橫目何如
烏能識直忽遭逢于舊識來牧守于輔藩預知屈獲之
得伸曾作薦鷄之妄想然讞議論難如諫諍而爭是非

而聽受春容若父子之相唯諾已多寬假况望明揚雖
嘗持筵扣鐘敢必取葑下體春風委曲亦到山家寒谷
暄和頓有生意亶茲寅幸信有緣由茲蓋恭遇某官見
與世殊道同古契高飛遠舉寧同燕雀之啾啾表瑞開
祥即振鳳鸞之翾翾有大用之斯在豈小試之足紆采
掬兼收規模甚廣坐令么麼亦竊生成敏事安能正恐
囊錐之嫌露清猷知慕慚向蛾眉而效顰孟堅敢不力
守恪誠永堅報效斟椒花之酒已欣逢歲歷之新入藥

寵之儲今的在門生之列

謝泉使賈秋壑先生京狀

伏準照帖舉孟堅持身廉謹治獄詳明充改官親民任
使者干薦崇臺蠱謗施於測海奏員末掾治遽躍以範
金不煩介紹以知己之深預定揄揚故先期而與念孤
寒而備至感恩紀以尤多竊以知人惟難當熟察于平
時薦士有權貴自決於獨見故聖門特著聽言觀行之
訓在近世始有因人成事之譏匪移集以權勢之臨則

假借于交朋之助甚至未嘗覲面若何盡識操心舉之者非所樂為受之者邈不知自取與已乖於理義報酬何有於功名此舉世以皆然獨先生而不爾燒玉三日滿歷驗量才拔茅連彙征皆由定見如孟堅天支末裔苦節癯儒面墻獨學于窮鄉艱辛備至食藥自清於宦路純白無緇凡著微勤夙蒙洞鑒駕湖詩社蚤憐螽趯之鳴畿漕幕評旁照蓬生之直薄知采下體於葑菲敢為撼大木之蚍蜉一干薦塗輒被袞字是謂歲寒有高

節宛見春風不世情衆稱公舉之無私孰識知音之有
素茲蓋恭遇某官心同古契見與世殊視富貴如浮雲
惟崇勲績拔才猷于脫穎共赴功名開明堂之丕基取
朽木之寸料園府已恢于國用化鈞行運于台司臧否
素昭陶鎔應偉第膺過譽彌切厚顏孟堅敢不佩訓如
規因褒知戒守廉愈謹畏揚震之四知讞辟加詳重唐
宗之三覆誓終如始報德與恩蘋末起秋風行快蒼鷹
之若逝梅邊問春信果占鴻造之無私

謝倉使吳荆溪先生京狀

伏準照帖舉孟堅文學自將智能兼茂充改官親民任
使者上介充寮曾微纖助首秋薦額僅為蓋簪寧遺平
昔之心知特了孤寒之身事彌天恩大跼地謝深竊以
五剡固重於攢花寸祿尤難于及戍待遠次者則動涉
數歲非執援者則坐過千帆未聞辟置于連月之間使
即纏裹其脫選之事况無介紹自出生生成信為卵翼之
恩殊多覆幬之造茲荷幸遇奚既頌稱孟堅真無蓋藏

樸不汙飾信情而往幾植植以冥行矢口而談不瞻前
而顧慮累叅寮于幕畫每取諄于時流幾欲揉裁終然
率鹵拳曲擁腫可憐難入于準絕容受包荒卒從下采
於葑非得於冀望之表倍增感激之私茲蓋恭遇某官
哲鑑覃昭公衡平一來從蓬苑益振文風肅駕網輪凜
甦吏習為矜烏哺之至念蚤飛鸚薦以先成惠纒西風
而馳王由東道者力矧崇褒詡更侈品題不學面墻文
何由進無能守樸智又奚長益堅敢不力勉修為事加

警省期於有立無負隆知悠悠旆旌少緩朝天之濶步
陰陰桃李庶幾指日以成蹊剩有輪囷之情尚嗣再三
之謝

賀節齋先生除京尹狀

恭審渙錫宸恩晉陞尹正夏卿望重特高九棘之崇班
日畿權尊庸旌三輔之善政上倚任以甚力人歡傳而
振聲恭惟某官充碩粹容堅凝定力有來翕受廣海納
於百川守節不移乃壁立於萬仞勤惜寸陰而靡懈廉

愈水壺之洞清昔時畫戟凝香咸謂三吳之富樂去歲
齋壇禱旱獨彈一己之焦勞能於歉東之時交修內外
之務猥猥列竈芻輓流通鴻鴈庶民粒食贍活至捐百
萬緡之美帑代輸六縣戶之常供如斯損己以裕人允
是光前而絕後頌騰衆口簡在上心陞除糾正未足以
盡寵嘉兼贊彌綸未足以寓獎眷惟是浩穰之都會其
誰寬猛之適權但觀右翊之又安可卜中邦之化洽式
煩彈壓益懋勲庸細民望惠若慈保之臨豪家怛威若

嚴師之至

謝陳文昌退菴先生舉科目狀

孟堅伏準照帖舉孟堅蚤著文聲志追古作嗜學不厭
屬籍鮮儔可充學問該博可備顧問科者蚓竅微鳴謾
呈薄伎龍門定價慨動賞音不惟揆送以箋天抑為揄
揚於當路復見前修汲引之盛意倍深常人感激之私
情伏念孟堅尅苦寸心孤寒弱植蹈仁泳德第期為道
義之歸含英咀華非但求文字之巧時感慨於遇事偶

歎詠以形言恠竒祇以自嬉紀述亦惟實錄棄捐不忍
藏積猥多固自識於非才初何敢以上達明友引類管
蒯俱前匠石無遺鑑衡俯逮忽加青盼以誤及有同朽
木之取材名重十科過許備承於詢訪言逾九鼎更加
贊援於澄清庸昭所取之必端預卜名揚之有及鹽車
卓樞顧伯樂以增榮蘋末蒼鷹逢三秋而必奮驟感品
題之有及不憂筆硯之無功益謹磨鉛仰符采菲茲蓋
恭遇某官眼高四海氣振羣英道雖大而能容德好謙

而並受行運化於陶鈞之上為世作程不忘君於試畝
之中薦材是務既揄揚之已力於從史以尤勤畀薄效
於攻文庶共趨於向學孟堅拘攣古格方嗟不合於時
宜附麗宗盟正愧未儕於士齒淹博何有顧問奚堪惟
礪勤心仰酬知己功名文章為差久益務磨礱論思獻
納以輸忠少圖建立

赴建康幕通海陵趙使君狀

擬從軍之詩已專餞禮脩通名之牘敢廢駢詞惟齋扉

既隆親炙之情於文書應畧苛儀之贅緘言近率論心
則真恭惟某官才疏以通見審而定在青衿之列好問
能謙當阜囊之馳慨懷勇往歷十年之日月當三邊之
風寒人謂艱哉君每安止待偉績之斯著駕脩程而上
征既分民社以位屏星旋措朝紳而列侯土茲勲勞之
應爾奚歆羨之多為於茲更加經理之功正爾大作功
名之會招兵耕渭築壘浚濠守則為金湯之堅進則復
土疆之舊此君侯方畧之素定亦小人贊助之當為雖

無膂力以彎強弓粗下工夫而學飛擲絕利一源收功
百倍得道多助乃集大勲願殫力於毫絲贊崇庸於彛
鼎孟堅磨礪鈍魯宣礪精誠豈敢以越幕殊塗不擬以
織塵足岳慨誓心而自此投眇已以為君恪聆驅策之
條共圖備禦之計同姓衛國如護頭目肯致赤心功臣
受誓蓋等山河相期晚節冀酌權衡之時令益調鍾釜
之天和式贊中興有光同姓

賀秋壑先生除總領仍兼泉使狀

孟堅恭審寵陟餉師任兼治事班穹藏府分命蓋重王
人職總利流理財其惟君子自天渙汗振地歡聲竊惟
財計登耗之攸分蓋自事權歛散之無統職幣於內者
未諒軍需之調度轉餉於外者不量國計之羸虛彼此
不相為謀肥瘠各自殊志惟專一其任而量入為出斯
洞究其蘊而養源節流通融幹運於一心銷弭滲漏於
百弊此自古設官之未達幸于今申命之合權矧屬通
才可占成績恭惟某官國之貴戚世之鉅人以肺腑之

親則體念也專圖鼎彝之勲於富貴也薄慨懷銳志展
在顯庸明燭秋毫老吏為之辟易計殫鞭算舉世伏其
䟽通比借重於荀班施活法於園府已驗泉流於地更
欲馬騰於槽乃兼餉治之司兼屬經綸之手聿申新渥
爰即舊勲加崇卿月之班式重使星之命翕傾輿譽知
演邦財命相之自唐朝必兼鹽鐵冢宰之於周典亦式
貨財共希明綸式驗故事孟堅受恩最切贊朴尤深秋
以為期待入山公之啟地分殊部俄驚躔次之移方此

兢虞旋還臨照福星仍守舊分合浦宛得還珠益昭夙
幸之自天不間施恩之易地亟飛賀禮印定龍光想當
移節之時正及上箋之日重念孟堅六考滿例五剡成
尖的憑薦鶚之書不負操觚之藝千金逾一諾知東道
之主堅六翮冲九霄覺西風之程穩

赴淮東常平幹叅李制帥可齋先生狀

夙覃梓蔭陰受維持新事油幢的隸舉刺遡平時而載
謝慶比日之欣逢思祇頌于公恩可自占于身計伏念

孟堅勁挺獨立竒單寡儔委已隨俗則少得世緣受知
達觀則每多天幸其所蒙于公者抑何侈于人歟齟訾
從師已篤同門之學絲蘿締好更崇附菟之姻微吟不
鄙其聲寒拙畫過嘉于心苦扁舟載雪以呈行卷遠驛
貽緘而寄斷碑作成者蓋歷數年提撕則尤多近日駸
駸脫選種種蒙恩每自感知夙深銘戴第棘寺未證平
反之賞而淮堧又從畫諾之遊孰知于此機緣乃是就
公纏裏顧一尖之合穎希萬里之高風東道主固有周

旋之心歲舉員恐拘減省之額祇惟大府剝有薦塗與
其從史諸人何如特達自己念鶴髮親老望切倚門而
鴈行助稀養微兼膳雖向寶山而求藥亦勞蝶夢之思
家儻其即次于明揚即可通理于零考頂踵一出大庇
絲毫何假它求洞傾直忱亟祈慨與茲蓋恭遇某官德
宇天廣淵裁鑒昭惟公無私軍民久屬于畏愛以寬濟
猛中外盡讐於威名驅馳既熟於邊疆彌綸更多於省闈
理內禦外以俱善出將入相以何難於昭異恩特任隆

寄開大帥府號小朝廷即躋莫枕于周京入任調羹于
商佐孟堅不慚婪尾力異成身辭家鬢未彫豈遽作悲
秋之賦從軍心固樂時或起白雲之思

上都省乞行平反賞格狀

辯明讞議粗有助於好生投誠化鈞覬速成於脫選雖
職守弗應於論報然朝廷嘗用以施勞有賞格之具存
敢自陳而忘僭庸抒懇惻上冀陶鎔伏念孟堅單微孤
蹤感慨直志蓋鹽黌舍嘗沾教雨之濡管蒯科名素出

恩波之內竊祿將周於一紀下考幸及於六書獵涉文
詞累塵薦牘狂狷論辯或與直聲將攢五刺之火僅須
一簣之進曩辱知於綉節謂垂意於丹書曾以鄰邦之
疑詞下質管見於公鞠病死者荏苒連月自經蓋出於
無聊被屈者附麗數人文致過誣於謀掠依阿雖可唯
唯陰隲其如冥冥殺一不幸尚且弗為於數重辟豈容
忽視矧有鯨吏肆枉平民強加殺人之名有同指鹿之
事悉為表前勘之承誤與夫明初驗之致訛牘上憲臺

豁從水釋人出禁網重見春生若是勤虔固多救正當
路姑撫兩端而上常員第求一免之從雖蒙印證於公
朝其如阻障於法吏但拘對哥不思失出之恩該固掩
微勞莫表平反之功倍是謂屯膏而吝賞或者借公以
報私茲謂忌心何有嘉善纖雲謾勞翳日揭蔀終獲見
天幸旅進於賓塔因力投於鈞造茲者恭遇某官勲名
赫奕事業恢洪淵鑒雖遠以畢昭寸長無微而不錄褚
公抑僥倖名器固弗假人魏相考功能片善豈令掩物

罔徇拘攣之鄙大明激勸之權班召命以使前傾聽聰
而逮下孟堅是用慨陳悃赤仰丐終成拔身選途奚限
常程於薦格報恩末路誓酬國士之隆知


上安吉使君黃寺丞狀

趨風部掾陳力未多干寵薦員捫心似躁惟已迫替期
之近幸及遇賢轍之臨補揆公車纏裹身事值機會以
巧的祈恩榮而敢稽竊惟遇主有緣論薦貴勇鄙侯方
一見而竒信何須歷試以觀人坡公於將去而知滂盖

以片言而得士暫焉目睫即定身榮此前脩特達之盛
心為後輩干求之藉口因陳拊缶或冀采薪伏念孟堅
雖拙賦材粗勤立志名浪占於瑤籍心加苦於韋衣虞
學蘊鹽垂成三舍禹門桃浪行越周星不辭奔走之波
波第恐身名之寂寂自闕譏而叅計幕由曹掾而入憲
寮粗以執方不隨趨下排豪家之勢復兩村占產而居
之民雪冤獄之誣活數人枉戮而出之死動誤知於當
路被公揆於連番或稱博雅以詳明或謂敏強而鯁直

花攢五削已蒙前守之照移月近初秋乃忽先期而去
任滯留癡守逼迫終更顛迎日伺於雙旌有望山成於
一簣曩雖際遇眇昧微加今者趨承工夫則淺惟精鑒
之洞物豈常程之取材縛柳為車且送窮鬼栽桃與李
賈有春風况得之而遂脫選之圖若予此則異常施之
比允為鉅惠寧可易云於焉僮拜于明揚信矣不虛於
公舉茲蓋恭遇某官軒昂偉量卓絕大官玉立顛顛有
任重之器風聲肅肅示揚清之權慨欲立勲而立名博

取有材而有藝收明堂之材具寧鄙尺椽開洪鈞之化
規豈嫌躍冶孟堅不量公庶仰翼全成願被歸榮以終
薦目及齒髮之壯日効犬馬以酬恩讞獄無阿果動知
音之喜啟言有取願占合穎之榮



欽定四庫全書

集部

彞齋文編卷四

詳校官起居注事臣顧宗泰

主事臣呂雲棟覆勘

謄錄監生臣陳長春

欽定四庫全書

葵齋文編卷四

宋 趙孟堅 撰

啟

上劉貳卿啟

一官未調魚竊類於上竿千金不違鴉因求於見彈輒
陳儷語庸冀踐言九頓首以陳情載歸心於大造竊念
孟堅生雖屬籍勤愈韋衣少侶以自將長落落而難
合祗應晦藏於林野決知難逐於市朝重以烏鳥飼哺

之情奪其猿鶴逍遙之性低徊科舉之習幾利方而爲
圓指擬仕進之榮類說河而止渴一塵末第五見新春
中纏風木之悲銳心頓減上爲堂萱之命彊顏載前嗟
四選之摩肩無一枝之著足比值海昌之曉關實於巴
里以隣疆風傳瓜熟之期指在梅黃之月抱闕為吏方
欣日近於長安攘臂有人幾是雷轟於薦福屬當注擬
俄致轉移取登弧以先登非其有也歷阼階而上訴豈
好辯哉然昌黎雖比於叫號而景仁不失其和氣言雖

近激心亦無他方噬臍於觸藩之餘將沐蘭於烹鮮之
地敢意寬容之納藪寄聲俯示於調停以羊易牛又何
較焉舍魚取熊皆所欲也自稟諭言之速幾希成命之
班及干赤縣之征商果沐南山之判筆乃知惻怛亦念
孤寒然而側聽逾旬尚遲該注未信功虧一篲之進必
也丹成九轉之餘寸綆雖微輒不辭於測海躍金罔棄
願終遂於鑄淵茲蓋恭遇某官訓學師儒文章宗老從
橐著論思之績典銓推流品之清兼溲渤以籠收備宗

楠於匠宰至於榘竅亦望陶鎔矧惟肖翹之微夙荷生
育之厚春官較士曾推透浪之鱗天部掄才應念遼枝
之鵲興憐聳動特達判行擲燕沼之蛙言式堅於金石
空冀北之馬羣亦取於鴛駘

改官謝總使賈秋壑先生啓

蚤歲遊昌黎之門在諸生而最久高年被山公之啓於
五削而尤恩及茲僥倖以隨班用侈揄揚而頌德伏念
孟堅生地孤陋面壁苦叅文非華飾以求妍達辭而已

仕不波趨而取媚顧理何如自諉涼涼分甘落落秬圖
便養猥任讞曹方固守於風波之中不計毀譽被明揚
於薦舉之數漸及周圓逢知己於冶泉可覃潤於隣路
冒昧啟請迢遙致辭借秋風於驛使之梅初疑好夢易
冰銜於餉臺之檢幸屬兼權堅操不改於歲寒公是不
搖於浮議摩頂放踵皆被德高天厚地喻深恩曩祗受
以惟慚今計量而益感遙申儼牘跼代拜塔茲蓋恭遇
某官特見不凡盛心近古尚廉隅之操狂猥兼收開功

名之門辛勤是取木牛流馬已飽貌貅之士冰天桂海
行清風雨之區作成委蔽以奠邦扶剔幽微而薦士以
若掄材之氣象可占宰世之規模準是融明懋壺摩礪
求斗筭於釜粟正慙匏繫之拘洗兵甲以天河終從豹
變而往

初任通憲使趙四憲啓

駕駟車而問俗肅欽部使者之威登龍斷以司征行廁
賤丈夫之役奉教條而謹始憑儷語以通誠恭惟某官

天資逾人家學高世筆下三千字早騰虎榜之英聲
中萬甲兵兼擅龍韜之秘畧精忠昭貫於日月重望雄
鎮於江山軍民孚德以傾心邊鄙聞風而破膽自著金
閨之籍累參油幕之謀膺劇任而弗煩見大敵而不畏
項屬遐方之梗化長驅兵馬以逾疆磐石維藩允藉一
方之巨鎮金城作固隱為萬里之安強親冒雪霜之嚴
力障風寒之險督貔虎以俱進除荆棘而不留山城重
歸版籍之全淮甸已息烽烟之舉卓爾斯偉謙然不居

高牙雄節而方寄以保釐粉省含香而旋司於繕監意
接武巖廊之上乃觀風繡斧而來治本和平一體聖朝
之寬大政行安靜盡捐苛法之滋張措八州於陽和長
育之中肅羣勢於震雷疾擊之下吏皆慄悚民靡枉寃
囹圄空虛已著三年之報效陶鈞塊圮佇聆即日之登
庸孟堅稟志迂踈賦材疲軟利方為圓於科舉之累望
洋啟畏於筦庫之司回思初志之自期殊歎壯行之有
立念平日粗嘉於節義每向風願附於勲名無力弓刀

縱不能效終軍之請有心筆硯豈無以感武夫之心至
如天矯懸露布之書與夫鐫磨勒天齊之石皆慨懷之
梗槩莫遇主於宗師指日見中興之宏圖有時備大厦
之末用昨擬歷堦而拜叙誰憐未面以前陳因通鄙名
附述至悃松茂柏悅儻念自同根而生狗盜雞鳴終或
有綿力之効

謝京尹顏大卿先生檄入僉廳啓

伏準使帖委孟堅入本府及安撫司僉廳者水歸滄海

夙傾東注之誠材遇工師終蒙下體之采感恩知本誓
已輸勞伏念孟堅守拙成愚將事過質盡信書而乏通
變不量今古之殊時好直道而尚激昂奈何人之異
趣曩於幕府粗竭悃誠事屬權豪同列趨趨而閣筆謀
深詭秘羣胥變幻以舞文居常奮筆而直書未始掣肘
而顧慮拂情者既衆紛毀譽之交騰公論者具存難是
非之終泯分安踈賤屏若退藏仰蒙遠照之旁加時分
隆委以誤及決濫囚之禁戴星而行拒侵疆之爭折筭

而定縱未得游揚於左右獲載供奔走於使令敢意肖
翹仍歸器使食蔗漸逢於佳境泛蓮欣從於英遊汎借
袞褒以光羅致用於知己蓋赴湯蹈火以不辭恪守初
心於易節變行乎何敢第以浩穰之天府藁然紛沓之
民詞欲少贊於神明又安用此椎魯某官江河容量日
月回光顯善表賢過張侯之淵鑒發奸摘伏邁廣漢之
如神塵淨天街波澄浙汭惟宵中既有活法故眼底不
見全牛指揮皆識時之才能芝蘭多有用之器局自慙

么瑣曷稱委驅孟堅敢不誓竭丹愚益安素守外盡磨
於圭角期終合於準程庶幾中庸斯無上負汗顏血指
服勞姑徇於此時醴藥羹梅佐用尚期於異日

又舉闕陞傍謝京尹袁大卿先生啟

百川宗海惟知洪造之依歸十駕鞭駑偶玷皇華之薦
引蓋吉曜臨則襍祥著秋雨至則溝澮盈非竊餘榮曷
有幸會奚必出於親舉然後謂以為恩伏念孟堅良知
近迂安分守拙詞非銜恠祇以自嬉行非好高第求不

苟弗以遊倅塗寬而懈怠敢云征商司賤而曠鰥粗心
章句之間或趣功名之表每念賀白之數子是亦景元
之諸孫論靈派則均曰璿源較同根則俱分若木彼其
萬丈之光燄起欽倔强之昌黎而方七歲之篇章嘉動
嘆嗟於皇甫遺編俱在餘響孰傳固殊夾輔之勲庸亦
可自見於言語豈伊遐武希我清朝邇年頗膾炙紫芝
之春山雲晚學抑雋永仲白之荷花水若律以三百篇
之忠厚較之數十韻之新奇遡流應合尋源玩華猶當

撫實山無烟霞則不韻水因風石而後奇竟所以然抑
又難語可應駕魯欲逐騰驤人方競筴於迂愚自亦衰
靡於日力敢憑言餌冒作身媒忽逢當路之達觀畧以
勤心而過賞呼之寂寞俾奉周旋薦自孤寒少從激勵
靖言幸會敢昧原由風引帆而舟移天彤雲而雪應常
日矧加於覆護前參復借以誇榮恩地有歸誓天無報
茲蓋恭遇某官權衡鑒真鼎石量宏鍾鄞山秀偉之姿
竦巖千仞傳潔齋清白之緒喬木百年心休休而容人

日孜孜以為善况東學親沾於教雨故此時獲被以餘
光迄是遭逢果茲成就驗樓臺之近水快鷓鴣之橫秋
孟堅敢不潔己自廉靡身酬遇願效冶金之躍更希鞭
影之加委贄師門敢效籍湜之輩究工筆事或忝游夏
之科

又投京尹裴晉齋先生啟

伏以暨靡鄰幕未供駑力於師門嘗辱袞褒輒冀鷓書
於薦格捫心知愧啓齒斯慙但斯時之遭逢係一生之

榮悴躊躇三復孟浪一鳴伏念孟堅賦分雖卑抗懷甚
介鄙場屋之聲病恹恹奇奇懲世俗之脂韋涼涼踽踽
髮衝冠而觀黨籍恍前身元祐之忠魂指畫腹而按輿
圖每痛心紹興之失策弱力自甘於運甕疾聲時發於
吟毫雖或被於擲揄亦間逢於賞可卑棲下邑謾仕征
司不因捧檄以趨臺寧得摳衣而侍席幸親範則况望
身榮獨憐薄官之升沈皆視公車之軒輊矧於職矧尤
重薦員鼎足貴全菁土戒止既黃華之首倡必洪造之

終成項於秋穎之既堅俾伺春風之俯及念賢才森立
固難強軋以求伸而與受難公未有不求而可得泯然
緘默則幾于自畫假之從諛則近於要尊謀心何止於
再三捕影庶幾於萬一載陳懇悃仰冀淵裁茲蓋恭遇
某官大巧作人無私用世斲總浩穰于天府旋司塊土
於釣台鼓壑羣材建立大業可否一定儼山岳之莫移
決擇素精判涇渭以不雜自憐樸樾曾入品題第未陪
左右之游揚又寧無彼此之畦畛然百穀咸仰於甘雨

萬象均轉於洪鈞願言兼收靡有遐棄孟堅敢不續長
襪線用補衮衣凡是生平皆為報日吐書蠅凍莫彈跼
地之忱聳翰驚飛立冀箋天之筆

投泉使賈秋壑先生啟

詩壇拜師匠嘗樞衣弟子之行薦路揚人材幸託身屬
吏之列雖未應援私恩而干公舉然久蒙垂定鑒以照
勤心不道舊眷於門墻敢冀新榮於桃李伏念孟堅雖
號屬籍頗艱奮身居處地偏渺黃茆之彌望卅年家否

窘垂磬之屢空既無師友以切磋又蔑簡編之閱復食
齋不云腸苦負薪每自行吟拈柿葉以堪書真行楷隸
緝韋編而洛誦佔畢雕蟲一從東學之齏鹽附麗南宮
之桃浪程文幸脫免覓輩於原夫吟事素耽轉攻心于
欵乃凡螭首龜趺之蹟暨商盤周鼎之文惓惓垂情不
覺疾雷之破柱孜孜得趣甚于披沙之見金非求好尚
之竒少見造次於是偶動當路俯憐寸忱呼之初筮闕
譏之中儕於上分幕寮之數為知己用肯為濟水之同

聲刺俗眼觀惟荷公衡之旁燭茲為偏觀而急祿來尸
末椽於猥曹灑涕對楚囚得情勿喜借堦白部使執法
不回竟出數人將戮之誣又動諸臺見知之悅仍叅畫
諾連被薦揚鷄書雖及二三蟻援初無毫秒孤立寡眇
惟靠廉勤遠地獨寒誰從成就忽報除書於英節頗聞
好語於鵲音得平生知心以為依驗五十榮身之漸應
雖十一路之屬部固衆莫匪干榮然千萬人之覩面者
稀獨嘗親炙庸希挾藻為合浮圖茲蓋恭遇某官報國

赤心好事青眼有姬公握髮待士之美同蹇叔好技若
己之休珠履喧喧廣羅網功名之士丹心惓惓在汲引
孤寒之人定成規於治泉即秉鈞而宰世孟堅歸心匠
石投已師模遙想隆知應無遐棄歲寒知松柏儻餘思
顧於十年春風不世情想被扶搖於萬里

謝李計使實文先生檄入幕啟

譏闕曠職方慙下考之書入幕充員旋被上臺之檄慨
感刮目之遇奚敢俟駕而行踈跼公庭輪囷謝悃竊以

士每難於自見况埋光彩於外察世罕過於賞音矧無介紹而辱命目睫之前尚莫知爾尺度之外誰其取斯好士如蘓長公暨識澤民而已晚有才若溫處士猶假石生而為媒未聞於一見之間初不借片言之助鑒憐勤卹羅致幽遐於昭公道之宏開庸占寒峻之畢達則為欣詫豈但感私伏念孟堅志廣計疎心勞效邁身雖屬籍素嫌華靡之為業謾科名本乏雕蟲之巧苦硬為文而見者掩鼻迂愚持論而聞多反唇分甘世味之鹹

酸心印前修之鯁介究元紹之更復每攬涕而觀黨碑
慕貞和之詞章嘗涉筆而擬魚雅衆方嗤其誕闊此獨
信其斐狂幸考官不以瑕疵而春闈偶從管蒯蠅營釜
養苟祿市征處幽篁而不見天圍亂山而常少日權輸
粗了儘長日月以耽書道有不同或嫌涇渭之異派第
人虎而我鼠任方枘而圓規信自頡頏奚敢較計比以
鎖廳而試藝偶前奉贄而趨隅拱拜楷模獲呈技倆蟬
游撼大木竟筴不量工師無棄材有來翁受爰加獎拔

俾奉周旋欵拜檄題恍疑夢事載仰崇臺之邃魚輸全
浙之饒事大而體宏目藜而務夥有翰動如飛之敏然
後可以效區畫無鞭算不窮之智則將奚以供剖裁雖
貪器使之禁抑懷綆短之慮允謂拳曲而臃腫被之黼
黻以丹青凜若兢虞悖不自定恭惟某官昭鑒燭遠大
治工覃身作世程心傳道統蘭臺執法明公論之權衡
蓬觀掌書壽斯文之命脉具篚釣陶之化暨迂飛挽之
勞將令舉世之樂懷生故不一介之遺寒士雨露牛山

之木胚胎鼎席之基坐俾肖翹預歸塊土孟堅敢不收
除目瞇振迅衣塵念平生粗力於脩治期此際慨為之
奔走磨鈇待割榮寔服勤赴火蹈湯勇酬知己之用漑
根食實敢作望梅之思

謝節齋先生檄入發運本府兩幕啟

用為知己籍湜終戀於韓門錄及菲材溫石果歸於烏
幕願奔走者甚久被寵使以方新榮遇漸字謝忱正力
伏念孟堅勤脩力勉劇任心甘謂草木無知故爾春榮

而秋腐而馬牛力走尚効東犇而西馳初非越俎以好
高抑欲報酬於遇主念福星臨照幸值諸臺之多賢皆
平日師資信是三生之一遇與其自局於州掾何如少
贊於臺網廣扇仁風覃恢厚澤此寸心之素願果器使
之親逢入贊讞評已知從史矧迂公檄畀筵兩司飛粟
轉輸既無鞭算之敏泛幕畫喏又微舌辯之能祗貪光
寵於龍門不憚回旋於蟻磨茲蓋恭遇某官宗工巨擘
良吏名師以肺腑之親同休家國鎮股肱之郡兼運餉

翰焦心為國以為民幹利足兵而足食謂大厦匪惟一
木而滄海寧厥涓流廣收小大之才共急理禦之計故
令綿薄亦與使令孟堅敢不為岳添埃榮寔追驥不計
成功之有所但虞効力之無由苟可捐軀尚何擇地辭
難就易實素志之羞為登明選公行聿觀於盛舉

初任書考回謝縣學友人啟

謬司龍斷自慙下下考之書飛翰矯竿益感休休心之
義與非所稱愧益滋多孟堅品品迂愚栩栩惹拙直茲難

隨於鈎曲方枘寧合於規圓血指汗顏既於公事以情
懂反唇誹腹自招舞手之挪撇正爾已羞奚當袞譽祇
貪言語之好兼慕隸楷之工藏襲籬箱永有模楷然相
規以義者古道若以諛取悅者世情其於過褒敢例摺
取古石著蒼苔之字皆是詭詞嘗稻沅翻雪之匙但供
衆飽

謝大監尹梅津先生舉陞陟啟

孟堅伏準照帖舉孟堅文章精神政聲輝赫充陞陟任

使者率陳斐藁為敬宗工慨上剡牋實出過望信高鑒
自有定見豈今時謂無古風興言感嗟非止私謝伏念
孟堅兒時孤苦居處荒涼稽制作於陳編初無師授究
理義之深旨不逐波流第以寫心何求媚眼匪但於文
而云爾至於行己以猶然加清明於單詞每申鬱抑納
忠赤於當路粗謂公勤柰投合之甚難有醜酸之異味
所幸當路之有口能於局外以明心翕從轉揚併入賞與
歛飛拔藻兼取迂材載詳褒許之言倍鼓激昂之志精

神所在氣不屈則詞伸顯晦何拘名必求於實稱因誇
知勉拜訓若驚茲蓋恭遇某官星宿羅胸中雲烟生筆
底卓爾師帥淵乎範模在舉子中已頌有物混成之賦
為文盟主稍憐壓轡玲瓏之辭不惟較藝以取長蓋欲
觀文而成化即茲風厲之意嚮可占鈞宰之規模益堅
喜得歸依益加振策知功名文章為差久不怠操備於
進退遇合之雖殊豈遽遷變誓於向去共建不磨願言
昌運之興隆常欣善類之彙進與地恢漢疆之舊願從

着鞭大字勒浯溪之銘慨先泚筆

賀蕭山趙宰菊坡宗叔啟

昔同寮幕多藉成身今並南邦懸知蒙潤聆交龜之有
日愧贅雁之後時恭惟某官膏梁盡蠲理義是悅歲寒
高節交彌久而如初長風孤騫獨親仁於泛愛一自辟
書之上翕觀薦墨之騰絲緣地貴而才高但覺天低而
風便以若騰蹕徑應邃清奚例從撫字而來特肯試錯
盤之所過都歷塊君其自此升乎血指汗顏我則愧茲

多矣孟堅真成失脚何許噬臍問版籍則虛無顧雁鶩
則渙散每煎熬於自解况頻併於年荒脫去未能焉依
是賴落筆驚風雨猶思陪侍於僉曹摘奸若神明倚聽
歡騰於衆口剩有評談之樂繼須郵遞之傳

謝發運尚書史雲麓先生合尖剡啟

孟堅伏準使帖舉孟堅好學而文律已有度使之撫字
必著聲猷充改官親民任使者雪城司臬曾何品題淮
幕為寮迄蒙吹送允重千金之諾宛攢五削之花成已

恩深拜堦謝力伏念孟堅奮身獨學克志甘勤曾舉途
寬不敢自易官游波靡未肯隨流力孳抽黃對白之浮
辭慨尚激濁揚清之勁節參幕畫則抑豪右議獄諫則
雪寃誣雖多鬼手之揶揄自有知音之賞激親民四刻
當路具推平反惟勞法吏故抑自張孤寒之應爾誰能
俯仰以求諸冒焉又為淮庾之賓竊喜仍在福星之曜
因頌曾蒙於許可或從終惠於明揚人笑斐狂自諉孟
浪敢意金丹得舐遂令雞犬以皆僊終然大匠不遺乃

俾管蒯以並取煥騰袞字慨合穎尖為加面授之榮抑
表心知之篤衆賓駭愕以動色孤生頓覺於光增茲蓋
恭遇其官天地偉量以兼容日月融明而畢照家傳相
業知洪化之無垠心好儒生每斯文之尚適務飛翥而
餉饋不忘拔類以揆才藩方若是賢勞台鼎可占著績
坐令樗櫟亦預準繩第味袞詞若幾過譽學雖苦卓方
慙華飾之無文已固知脩正資矩矱以作則益堅敢不
佩言遵訓景行從風行施撫字之間弗變廉勤之守有

民與社從知職守之非輕報德酬恩賴保清名而不湮
賀漕使趙虛齋新除啟

恭審拜恩宸陸總漕京畿丞轄宣勞久著彌綸之績寶
儲寓直聿崇飛輓之權君子理財庶邦叢慶恭惟某官
氣宇陽春而又韻風姿玉潔而更清鴻寶秘篇究東壁
圖書之奧錦囊佳句織天孫雲漢之章侃然華靡之不
為旨哉理義之是蓼蚤攀高桂宜照青藜乃徧歷于民
庸而上通于閭籍潘花滿縣棣萼分樓篁屏乘駟以申

籌赤子弄兵而浸弭兩邦慈母咸依豈弟之仁一路廉
風舉激澄清之化仰寬平之無濫宜藁委之兼資屬時
國計之煩興借重邦財之妙幹彫敝已重須假福星之
照臨調度方滋所藉飛芻之贍給然剝床則有及膚之
慮而漏卮又深洩尾之虞非無趣辦之才恐傷忠厚之
體徧籌內外允藉溫良俾十五州無期會急迫之憂此
億萬年昌宗社延洪之脉慶闕國計歡動輿情邦畿號
使指之雄整煩澄察宅揆秉國鈞之重行職陶甄孟堅

好修有心翔寥無力虞庠弦誦恍乘桃浪之三推闕市
譏征嘗厠蓮幕之一數即之也溫備四時之和氣撓之
不濁凜萬壑之層冰治所至以有聲才無施而不可一
麾出守甫著外庸四牡載馳徑司平糶鹽筴羨流通之
利民生無饑饉之憂遵海而南舉蒙實惠自天而下倏
昇殊恩俾專飛芻輓粟之權庸副卧轍攀轅之願咨諏
謀度重觀繡節之新獻納論思佇復青羶之舊某側聆
成命倍激歡悰千里而遙愧莫展鳧趨之敬二天獨有

金匱要略卷之四
卷四
幸復依鴻覆之私瞻詠殊深刻裁莫既

又代謝澗漕薦啟

績文種學僅知蟲篆之工校藝程能猥玷鸚書之薦得
踰望外愧情溢涯竊惟諸道之貢闈莫重二漕之漕舉
預選者踰五十雖云取士之優旅進者凡數千總是出
羣之彥矧今歲大寬于舊法而四方咸激于壯懷負篋
擔簦于于然而來矣發天中的戛戛乎其難哉苟非擅
聲律之長何以預甄陶之下如某者碌碌餘子空空鄙

夫問一得三蚤佩鯉庭之訓駢四儻六每虞鼠技之窮
命與時違勞而功少慨折翅于里選欲振翼于計臺強
壘滿前方切倒戈之慮孤軍冒進浪收奏凱之勲揣分
奚堪歸恩有自茲蓋恭遇某官英安山立雅量淵澄世
莫與京挺挺紹祖風之舊年不可及皇皇秉使節之華
貴名曾冠于羣英贖馥旁沾于後學分題革弊待士致
恭欲舉一人焉拔其尤雖占小善者率以錄遂令翫骸
亦預選掄某敢不益務磨礪載加鞭策搏扶搖之九萬

願陪鵬翼之飛掃禮樂之三千冀奉龍墀之對士伸知
已書不盡言

賀嘉興倅吳履齋就除守啟

擢自屏星收茲藩土二千石良吏民知慈母之臨十五
載掄魁士有淹才之歎獨欣知己式撫鄉邦歷具激昂
少陳贊躍恭惟某官丰標玉立襟度冰清森羅星宿于
胷中縱橫禮樂于筆下天人大對世謂鼂董之後身性
學微言派傳伊洛之直下便合立從香案小却躋之王

堂為國光華乃君本分曩胡謙抑每欲退藏然劍埋豐
城則光射天而水遇瞿塘則聲撼谷果興思于丹宸俄
接武于清班滴露研硃芸閣幾勞於警校菁莪在泚蘭
宮多藉以作成為重外庸又煩更試眷茲輔郡借以監
州風烟入懷每見成章山水可樂若甘吏隱人皆汲汲
我獨于于民喻志而已孚事不勞而自理休聞翕上簡
心益深謂半刺若是其聲光則承流可占其政化聿表
除目高建崇牙笑領魚符想規模之素定香凝燕寢煥

風采之一新花鳥亦皆欣然山川莫不寧止即長史而
為并都督故事已符以刺史而拜漢三公盛典行舉益
堅迂踈未學雕篆微工嘗升堂以親色詞抑過門而呈
伎倆未蒙捐棄少辱矜知日新快于象班情實同于昇
趨膝屢願受已歡顏厦屋之中狄籠兼收或效力牛馬
之走

賀陳可齋憲使冬至啟

伏以振節崇臺管領初爰之剛長埋身下掾欣榮九地

之陽回慶應時之福申冀覃天之澤普恭惟某官節高
松操德愈梅清公道陽舒排羣陰而盡屏恩波雷動鼓
衆彙以咸甦身同北陸之獨寒心望東皇之普育觀臺
候雲氣想祥擁于吉星春風不世情願綠滋于枯草

賀雲麓先生除紹興帥啟

恭審渙班宸綸升鎮藩府東甌岳牧式崇帥節之雄西
清邃嚴庸示文儒之重帝心寓眷于柄用與情翕贊于
歡聲恭惟某官典型傳家貴顯奕世許公濟美有光文

穆之勲名忠宣在朝竄獲祐陵之眷顧矧是謀猷之外
展已多膏澤之下流沛運餉於木牛衍熬波於形虎左
馮著循良之譽三吳騰富庶之謠文昌班行久紆八座
之武太微垣次新占一星之明人共俟霖雨之及民上
允念相門之克嗣奚尚遲釣台之命又煩分斧鉞之權
眷言嵇山實維潛邸孰繼難兄之躅須藉墁荒為重南
陽之邦是資藩翰謂君家有扶日之績故侯封在流虹
之區載稽分命之及茲的顯具瞻之有屬雲門蒼翠歡

同竹馬以來迎沙堤委地行報袞衣之歸輔某肖翹自
幸際會有初始受滕屢荷賞微勤於筆藝逮遊庠幕迄
蒙合穎於剡箋掖天恩光曾未報酬隨地陽春又茲趨
事夙固銜環之有志今寧陳力之無階况計及瓜之期
適湊班條之際此機緣之就巧信頂踵之蒙榮謹先拜
堦欣叙賀屢催科定拙預希繩墨之寬施恩素深豈越
帡幪之外

代作院弟安吉趙倅啟

冰柱雪車夙仰兩山之高致鹽車皂櫪行逢伯樂之青
驢肅將事上之恭因述由衷之語輪囷布牘特達望知
恭惟某官鳳覽德輝麟遊治世粹質萃璿源之秀潤雄
文鍾星婺之光芒夜雪灞橋已富錦奚囊之句鈞天帝
所遲賦沉香亭之詩笑攀月桂之兩枝清哦黃竹之千
挺手扶雲漢妙製作於上方花種河陽仍早康於畿邑
矧吳興乃茗雪之名邦而長史有風烟之逸興詎能躁
進且樂清遊蓮歌動夕泛之舟蘭氣薰山行之屐時岍

憤而嘯詠或肆筆而批塗風月藉以輝光山水添其鮮
碧南樓吏隱儘無耽松雪之娛西掖詞林行促侍金蓮
之對某行卑屬籍世業文儒皇祖占紹熙之甲科諸父
聯丙戌之上第以至雁行之輩居多鷗化之人書種傳
家舉箕裘之不墜泥塗失足撫松鶴而獨歎固惟鴛鴦
以使然亦為見聞之弗廣今將升堂攀木持筵扣鐘義
倣師生親同子姓黃鍾儻隨蟄動青蟲亦化蝶飛含垢
匿瑕不但求萬間之庇溉根食實是將託六尺之孤

七夕謝文園饋節啟

偃僂事再拜懶陳河鼓之文籠絡送八珍忽遂侯鯖之
品儼昭隆意庸紀佳時駢羅列筐之登珍重一忱之感
蹢躅吏隱移牀但看於蛛絲赫奕王封飛綺佇占於鵲
喜

送知府俞大卿七夕劄子

某僭懼申稟某恭惟銀漢雙星之渡與天俱久與時俱
新宜有以薦一齋之敬僭易瘡羊半體生蠲十枚馬乳

七斤巧餅百事謹拜手塵獻方茲錦樓高張吸飲花露
眎此下品殆不足進倘許雜陳於芳馨之林某幸出望
外冒瀆尊崇當暑冰凜仰丐涵貸

又送鄭廣文七夕劄子

當暑不敢多稟首丐涵照方銀漢雙星之會詎應無以
為芳筵薦得醉蟬魚百尾馬乳五斤拜手莞留之寵輕
觸重繡天巧滿前顧以此塵品自見其用拙亦甚矣餘
須侍對敷叙併伺委答

送俞守七夕劄子

某切審靈仙問偶駕白鶴于緱山西母遊神集青鸞于
華殿絳河雲合天上佳期綵線月穿人間樂事可無微
物以表寸誠率易羊臙荷根仰薦明星之酒輕瀆尊崇
伏深愧懼仰空中之繡幄知正視之無緣曝腹內之殘
書尚品題之有望區區伏祈照察

又送林郎中七夕劄子

某敬承青楓丹桂之舟往來秋色間上與星漢通河鼓

雲車佳時勝會俯眎人世之追涼覓巧正不足供一笑
某尚敢撫溪毛之潔以請真未能免俗者宐惟高明姑
首肯其塵某幸出望外凌躡兢慙拱祈涵宥

又七夕送物與薛参政

雙星嘉會百鵲爭鳴巧席迎新潭居浹笑某憑藉眷遇
之隆忘其嬰觸不腆菲物班諸別楮百拜申裒庸求附
于瓜果之末倘蒙鈞仁莞而勿罪命之日留千百至幸
犯嚴之譴拱湏面侍以列仰祈鈞答

又回七夕節儀

星女臨河敢窺天機之巧月御洒汗遽分雲錦之章香
泛樽疊珍羅鼎俎恥匪頌之難稱知眷雅之逾深百拜
登嘉一忱增激某下情無任皇恐感謝之至

又回通判七夕送物

竭來逾月倏見秋開銀漢會星金天流火仰承眷意過
辱華賤寵以蜜酥侑之珍品西果滿堆於馬乳南烹如
得於蟹螯輪囷謝私登受感佩

又回徐二學士送七夕

某近占好事五雲細織之新遠念勝遊雙星高會之舊
懃斯藻縟之意貺以芳臚之珍瓜果之筵得此不貧藜
覓之腸侈然自富巧諒非於人與拙祇用以吾存今年
必勝於常年此夕莫知於何夕飲牛有約須言感於秋
期噪鵲無端乃錯傳於早訊佇觀奏雋母俟乞靈銜荷
拳拳具報草草

又回朱郎中送七夕劄子

某昨布敬戴閣比介雖未旋計已塵淨雲之聽快焚如
許正懷未能訪便稟調忽被八法之妙倚風快誦字字
如玉雖宥之清涼國不若是其爽也謙尊而光騰記采
薦籠鵝厨餅之饋特以煥其星節回顧昔時列瓜果於
中庭今盛意所臨尤增感慨謹進使人某再拜登受矣
郊外夜歸不克函修謝幅填膺銘感之至儲存侍控仰
丐澄矚

又回何宣教送七夕

某伏沐藻帖誦之清風習習也肥矜名尊為星節貺遂
使棲懶之餘者又未免追涼逐巧矣勤眷若此辭則弗
容受而有感占報草率尚遲謁謝

雜著

陸宣公祠騷辭

祠在嘉禾東門駕湖水中自節齋先生建立連政修崇兼以陳

公舜俞趙公汝愚配祀然未有明建祠之意以
為迎饗送之詞者既不揆賦楚辭以補祀事之

闕文
云

滄波兮鱗鱗渺涵浸兮青天引余睇兮何思思有唐兮

貞臣世混濁兮其逢豈余宜兮弗伸蹇溷嫉兮羣僉紛
吠噬兮狺狺慨百奏兮仁義跪長袂兮重陳不負君兮
與學甘殺身以成仁能不忘兮在莒豈土運之中屯遺
高風兮來思羌有屬於後人侯是邦兮多賢美人才兮
作新擬薨棟兮龍宮招忠魂兮水濱合里社之前修配
祠祀兮拳勤公神遊兮九霄奚是邦之獨親維桑梓兮
必恭寧作興之無因期滋蘭兮成芳戒一蕪於衆薰彼
木蘭兮桂槩蕩秋月以花春醉壺觴兮流泳雜雅鄭兮

續紛誰于是兮興懷曾華實之靡分朗余詞兮一奠儼
英靈兮若存

景陸堂宣公泉銘

并序

甘棠勿翦峴石興思慨念先猷其來尚矣若夫旌遺芬
於既往開微緒於將來撫物興懷即躬詔訓風以動之
厥有深旨欽土思泉宜黃君之所甚崇也君雙井太史
公之諸孫域其名蓋之其字也質凝堅壁捺肅稜霜事
上無諂戢下有威其諸古之遺直夫尉是禾興考圖繹

志曰嘻其敬哉維治之宅唐相宣公之遺基也坎甃之
泉亦吾宣公之鑿也彼美人兮窅弗可覲幸徵其迹也
允見其迹如見其人宜景其行也表而彰之吾惟汲汲
何昔聞之寂寂也於是即其基肇堂曰景陸堂礮石楯
泉曰宣公泉豈徒侈輪奐濯滄浪而已哉端居是堂夷
夷于于榮辱俱忘寵內相遷忠州始終一節乎漱芳新
泉湛湛泠泠甘辛無作毀實叅救陽城恩讐兩泯乎其
然無愧然矣居心固合於是表而彰之景仰皆吾心乎

忠謹皆伊人乎一物之微善人心之樞紐乎小子孟堅
庸嘉乃心敬述以銘僭其美辭乃銘曰洵美宣公品品
忠兮延延英聲千萬齡兮匪如伊人孰體諸心履諸身
兮維涪諸孫如玉溫兮冥冥心孚若合符兮乃肇乃龍
高風崇兮其夷其冷予以鑒中扃兮敢告後來毋使此
風頽兮適吾之願兮公千萬齡如親見兮

枕屏銘

夢親當思孝夢君當思忠夢得當思義夢達當思窮夢

慾當思室夢選當思從更貴常安恬楊花春晝風

典獄箴

并序

郡糾曹鄴史君某謂諸王孫趙孟堅曰凡厥官守俱有
攸箴祇惟典獄未之有聞子為我詞將勒石以告典司
是職者庶其敬戒若正孟堅曰孟堅曩司雪李曾掾具
知典司生殺從出人命關焉國家以仁立國治體關焉
有陰有陽是有刑賞造化關焉厥惟艱哉嘗擬刻詞以
告然心吾心不待告告亦不懟否則聞斯面發赤告奚

益曰固然姑述以倣盤盂之銘寧不有警中人以上可
為善惡間者乃為之箴曰一陰一陽主生主殺賞善刑
惡于天是法姑息縱奸苛細流察惟平厥心乃洞毫髮
少以恕行國體斯達自揣而昭恪尸是官勿冒而居有
覲面顏或尔所餒閣筆晚吏舞手而乘重輕易位亦有
過矯銜明暴厲或徇己私或附旨意鉤距煅煉置人死
地仍有黷貨以私蔑公惟利是媚如盲如聾折抑曲鬱
冤報無窮嗟人體膚父生母育孰非愛惜鞭扑桎梏風

號霜厲以之成歲不有刑章惡淫靡制以刑示訓乃仁
之至用豈得已豈伊忽視偶淪曖昧明其匪戾有事誣
蠆排彼譎詭執迷底滯開讐釋寇長吏鑿差委曲剖示
權與勢來有死無二庸庸祗祗如臨上帝敢告凡百警
戒於是

為張道父贊二畫

卓杖褰裳苔封石滑飛泉下奔電激弩發對此兢兢謹
戒斯達君子人與予以得檢身之法

右臨深

謂可涉歟或虞其澌謂不可涉歟已至於斯觀此可以
知易既濟當如未濟之時 右履薄

二十贊

松島或生臨老
融畫煙雨館作

川平草肥竟日忘返及爾還歸山昏路遠噫吾竊笑夫
迷途而見晚者也努力深耕瞻活大衆卻行不前牽拽
乃踵噫吾每鄙夫有力不施於用者也

為仁師贊彌勒佛

見說你將出世且莫只管昏昏睡多少鶻鶻突突底要

你討場分曉理

金山順濟廟英烈錢侯碑文

夫聰明正直謂曰神靈膺國褒封饗世血食歷祀不泯
主福主災赫然炳靈人恒斯畏豈偶然哉克孝克忠為
國犯難生昭直節歿助陰靈者也英烈錢侯所以身陪
正祠封受顯號其以斯乎紀石傳芳示垂奕世請從具
載寧厭纖委西折諸州未興最為邊海華亭縣小金山
者又在郡東挿脚滄溟峻岸截起驚濤四浮吳國備史

載漢博陸侯霍公附小黃門謂吳主曰國之疆土東瀛
海濤虧蝕侵尋臣漢舊輔今當為神駐小金山為禦海
斥使不衝蕩全護國封當為建祠于彼金山示所旌顯
自時厥後封祀不絕今為忠烈王順濟廟焉維英烈侯
冢閩氏錢行位居七航海而商舶帆輕從入廟致禮儼
觀威爽雪浪東來一山若峙巖巖殿宇卓冠山椒地勢
神靈軒赫斯稱又諗王忠存漢社稷歆生敬慕若曰浮
沉罔利膠轕迷塗汨渙塵中何終底止歿事忠臣愈浪

生死猛念倏發幽明洞符玉立廡間叉手矐視不歌不
倚窅然化歸異哉於是驚恠顯迹為廟部臣老宿相傳
幾百年矣季夏之月廿一日維侯生辰沿海祭祠在在
加謹廣陳鎮金山祠祀尤嚴常歲是日鹽商海估寨伍
亭丁社鼓喧迎香花羅供然前無位號未應國經仗隊
弓刀遙稱太尉殆幾野廟殊闕聲猷屬青齊向化之年
金人猶競東鄙興師侯能助順虛無之際神証用彰霧
滃雲飛陰兵千萬排空而下旌旗著號華亭錢太尉識

昭明逮及交鋒敵勢披靡風駟電掃冥助維多主兵上
之公朝訪尋允合爰加封勅謚以英烈庸奮靈休端笏
垂紳榮彼章服從飾伏衛益變魚雅孟堅母弟孟淳今
嗣秀安僖王曾元孫曩居里日嘗謂言曰英烈侯神靈
國勲如是其偉兄志於文盍為紀述其永聲聞當備樂
石以奉刻詞茲以書來石既就礱紀弗可後乙巳上春
甲子薰篆滌毫寓誠歷叙因作言曰夫所謂聰明正直
謂神者豈誣哉忠烈王功存漢祀雖世祿不嗣於當時

而廟食乃存於異代蓋忠誠勲績迄莫泯忘英烈侯初
焉非衣逢掖道先王者一念向正即隸明祠惟王與侯
膺蠻相應如斯至者心公忠耳故侯卒能效順佐邦卻
殄強敵使侯居廟堂而職臣事殺身成仁夫豈難能者
鄙夫身縻好爵畏事齷齪當言不斷口若置箱鼠計自
營矜視同列苟利飲啄縮縮循墻鬼域斯靡何有何無
若拜侯祠有汎其頽孟堅疇昔之夕矚視岳神節仗旋
歸續紛肅截壁月當午蕭吹撼空文繡兒郎粉黛優女

晝燭椽列夾道秉行敬拜奉安一無醉懈頷而問曰此
嬰白社稷臣也心實歆焉曰有親在無伐言曰人死留
名豹死留皮丈夫大節雖死猶生睢陽之忠常山之操
平原叱希烈太尉擊朱泚讀史凜凜恨九原之不作也
神之為神其以是夫因述侯事遡頌王忠夙公忠鯁不
覺宣露為之銘曰正直為神維忠維孝國有常經祀典
崇報博陸在漢擁昭立宣雖曰世祿不我以延逮及異
朝血食廟祀為禦隄封叱捍潮水毋使侵齧蔚厥疆理至

于今世靈威若存英烈錢侯起身七閩浮舶而商致禮
英靈惟公與直志合心傾一誠默孚旋隸部下拱立廟
廡杳然冥化東海之濱奉祀畢虔位號封崇若有待然
厥敵不競東鄙興師維侯助順若響之隨神兵千萬陰
雲擁之敵勢旋靡電掃風披昭靈顯切褒號英烈服爵
儀衛一變緜蕤我刻銘石匪事誇雄寓勸若人知孝而
忠為食君祿當勇於事事依違者將焉用彼致忠于君
奮不顧身身死不死其名永存史傳紀績廟食薦馨吁

嗟鬼蜮苟蠅營宋彛齋趙孟堅記

為宗學立愛齋同舍作祭土地文

昨歲元日聖天子奉玉卮為慈極壽恩賚旁加諸生咸
免秋賦翕上春官繇茲甲子以往三日實維試藝之期
是用列拜一詞乞靈神祇為是禱也然禱之罔不在吉
猶歲之罔不願豐某等終歲孜孜耨荒耘耔亦粗勤止
若夫得之於心若或啟之筆之於書若或相之爾神其
無賴哉香明酒清敬以將事神其聰明庶幾祐之

祭土地興文王文

神涖吾學何莫不司况羣試春闈由是服命王官允為
重事其敢不告酒穀其登馨香必芬達神之靈神將若
曰若愿而勤業精行成是日也俾清明其神氣斃於而
詞決科如拾芥然神其懋乎此忱

繁昌縣學南豐祠堂祝文

維年月日具官趙孟堅謹以清酌之奠告於南豐先生
中書曾公孟堅初抵邑奠謁學宮堂廡之東祠曰三賢

問賢謂誰曰先生聞文記邑興造荆國王相記學之成
爰並祀茲蔡相確嘗令邑因麗焉孟堅曰嘻是得例曰
賢乎且荆國曩列從祀聖天子詔其曲學謬差媒進小
人基禍誤國屏而斥已疇敢復存確鬼蜮姦造謗滔天
誣蔑我宣仁聖烈太后掃除正人以致敵難罪通于天
誰其薰蕕罔銓徒以令故而齒是諸伊蔡與王並從斥
徹維先生高名清文是敬是式儻及在元祐建中靖國
間則必偕紫薇中立輔政決不為布之黨姦也奉祠敬

止繇今丁祀籩豆犧牲分享于祠視從祀禮爰率學徒
昭告以聞尚饗

告曾高祖墓文

吾家渡江卜居廣成已逾百年衣冠為盛紆青拖紫殆
幾百人以科第進僅十六七朝紳旄節前後相輝以舉
改秩則方再見孟堅何幸學校竊第考舉晚選乃兼叨
忝允藉祖宗福蔭斯及知本知報懇懇寸心誓殫蕪勤
期於無墜試邑將行束衽昭告惟我祖禰益加庇康俾

暢官業

告祖考墓文

我祖云往家運中屯我父苦辛曾蔑小秦祖及見孫期
于有立父屬爾子勉從奮興孟堅兒時慨體先志力貧
向學獲竊末第一紀從官三任改選分邑暨浦指期駕
途拜墓告虔俯仰感慨惟我祖考福蔭加崇由是而之
績業更茂

告伯祖桂陽使君墓文

孟堅兒年家否貧無學資惟公延師收拾教誨伯祖母
氏顧憐尤至中間辜負惟多曾無過尤撫存彌厚歷歷
恩紀每圖報酬竊第有年甫茲晚選謹庶自舊未脫儒
酸惟有報心皎皎常在向去寸進須表毫絲試邑將行
跼躬敬告慨念夙昔百酸攪腸再拜申詞淚落清奠

同諸暨縣官祭江陰史君趙監薄文

孟堅等仕通德里仰喬木家欽止令聞玉粹無瑕所積
者厚所務必遐公侯衮衮大纛高牙指日可詣誰謂一

麾竟止斯耶識與不識莫不為之痛悼而咨嗟者也祗
率寅寮旅申酌奠稽首敵詞有淚斯泣而孟堅者丁年
學校行藝尤欽擇交不苟義同斷金彼輕且猥錯立如
林人虎我鼠未始競心涇涇渭渭允有知音青燈相對
夜漏沈沈擁鑪促膝吾伊苦吟歲寒高節屬望允深方
圖依倚愴判古今遡念疇昔心攢萬針此孟堅所以出
位摧頓俯仰未艾不知涕泗之橫襟矢詞弗翦一寫真
忱九泉有知于茲鑒歆

祭女文

年月日母兄遣幹者施椿遠將祭奠告于亡女趙氏五
三縣主孺人之靈吾女縣主喚復應否哀哉吾腹誕吾
女僅汝及長愛之鍾也生而慧成人而淑盛年而夭云
亡未之信也相望千里病不及視死不及訣殮不及臨
痛之甚也報訃兼旬茲甫舉掛又莫親往遣皂代祭哀
抑至也家釀清冽汝飲斯便以酌生芻汝歆饗否吾詞
悲惻汝知聞否哀哉汝幼而長甘苦吾同歷叙于茲汝

其聽取汝未及笄儼已成人承順色難了無齟齬吾家
儒素攻苦澹泊習以安之組紕縫紉教輒通解待人接
物婉委春容人皆汝期壽考成立自議姻盟祇慕閱
不量齊大竭力遣嫁汝兄三年奔波于外一縷一物親
辦親營必當汝心不計難易汝所知也從人以來十有
四載良人諧汝姑嫜恤汝妯娌友汝族黨姻盟咸愛敬
汝上下內外媵妾皂隸無間言于汝表汝為人有可尚
者閭內之事于汝屬也惟母及兄亦汝期也汝自豎立

克負荷也天何慘諸畀汝淑質不長汝年斬焉中天又
無嗣息壁碎雲飛空中聲滅聞者悼悵何況所親何況
骨肉若罔知覺木石其心汝訃之來母之與兄適皆在
病哭枯無淚叫絕無聲逾今兩旬行住坐卧唯啼唯泣
思汝面目想汝平生一見無門冥冥夢覓亦莫再逢若
痛苦痛何可復說汝無別病惟苦脚氣頻年發動玩視
為常祇道宿疾豈謂喪生去冬極寒書來說病固知增
劇滿望春和可從藥喜早知遽爾作急救療豈至斯耶

汝寡解事多慮多思親睦姻聯殫力逢迎惟求禮貌心之所詣力有不加營耗精神病亦由此去年此時兄將之官母病在道旅泊烟雨問藥醫師汝翁汝夫深相存卹汝日繼夜夜不解帶調侍藥餌備極孝心況在少年不惜支體救親病患如古孝烈使為男夫忠孝應至及吾病過揚帆啟行送吾城西雲壑塔院閣淚告別不忍舍吾吾在華巔每虞風燭未經年歲翻哭汝喪哀莫甚此汝既云往所可無憾惟在送終聞自瞑目厭于有尊

拘忌過多屏從別舍為人子婦豈是孤魂欲遷蕭寺尤
非禮式汝之靈爽冥默之中應念何咎生死遽殊昨為
同室之人今為舍外之鬼母兄致書曉汝尊者即安汝
柩姑停竹西徐議歸藏必有攸處汝其安止毋恐毋驚
以順命分英氣不消再生必遇悲隨念到萬萬千千哭
已無腸且此收拾遇汝每七薦供于斯百日暮年及至
攢墓須再祭聞哀哉哀哉吾女吾女止于是耶止于是
耶高天高天訊問不應

祭持要弟文

年月日兄弟某等祭于孟三節推帥僉文林之靈嗚呼
騏驥千里出門斯蹶寶璧墮地應手碎裂惜哉傷哉惟
汝聰明肇自弱齡翩翩文思下筆不停年未及冠胄薦
標名南宮前龜拾芥取青充其餘力學靡不成隸古題
勒字法勁精吟工雜著既博且宏施於宦業綽綽有聲
三任五考奔波不少自吳入淮幕府選表瞥飛五鷄榮
勲亦早來歲為期秩改班到遠業窮官期汝非小冀汝

騰驤門戶有耀天胡不仁竟爾已焉不使之終老耶方
汝疾殃相望一方莫究病源攻其膏肓或云服餌厥匪
溫良果因之而致損傷邪抑一定者數不可加其短長
邪爾况在都聞汝病急相從訂訊日者龜筮布著筭揲
咸弗謂吉短燭寒宵相顧失色的報未來莫為汝詰維
揚急脚言訃歷歷曰季冬九日日未斜側天亡若人鵬
鳥入室又相與掩泣銜哀猶冀此言之非的也誰謂汝
之後偉汝之充碩奄然一逝真成永隔嗚呼哀哉最汝

悲者丁男未育親髮半白及此云亡覺變允極命汝之
紀歸汝之骨事貴從長未應倉卒書報汝父相與紬繹
尅日舉掛招汝魂魄汝尚知否吾淚血滴尚饗

從伯故麗水丞趙公墓銘

代作

有宋通直趙君行之之墓在安吉州歸安縣鄉山之原
嗣子孟璠以紹定五年月日奉襄事乞銘于某以丙戌
進士同登有是請也噫天之所畀每嗇於所宜與此從
古所莫可詰今又重歎於君焉君以敏悟之資秀出璇

源方弱冠已薦取應舉寧考登寶位補官右選調管庫
之任于婺于秦于衢者三又監御前軍器所司行在草
料場蹉跎西階逾三十年未嘗一日忘科舉業也故自
丁卯迄己卯以鎖廳試而舉者亦三春闈率不偶積階
至忠翊今上皇帝賚賜予換文階舊比宗姓換階視見
服官品忠翊則應得京秩新制裁革回視初薦僅循從
事丞處之麗水君平昔遊際貴達方將汲引郡侯葉公
武子趙公必願咸加獎且薦其才庶有行也而君疾不

可復起矣悲夫以半生績學之勤裁於制不得有其有
而下從選調淹矣而又奪之年不得詣高壽賦與之嗇
可詰也夫君諱與時年五十七紹定四年十一月日終
上章告謝尋通直命下弗之覲也曾祖伯穎故修武郎
祖師古故秉義郎父希宜故桐城令宣教郎致仕妻魯
氏少卿公嘗之孫女今封令人以男孟珪皇姪右監門
衛大將軍郊恩也長男孟瑞故承信郎次孟珪孟璿女
四人孫一人奉公之喪麗水者母弟與善也惻為之銘

曰謂其可必天則爾嗇謂其可期天則不可知厚其積
乃狹其施其後人之貽

